

表異錄

卷一至卷八

風陵文庫

文庫19

F173

1



# 表異錄

## 表異錄序

河渚先生上下古今纂述百氏其所編緝原瀆諸編與史商說刪等書半已爲世傳誦歿後八年而其所集表異錄始出蓋其披閱之間或字或句偶有深奧輒筆錄之一時寄興非欲成書也久積爲冊遂傳家塾近始傳錄一二本友人遂爭購之因授之梓書成予讀而歎曰先生之學豈在是乎而世購之若此耶先生學術極有原本其綜核史氏貫通千載如老吏折獄又如心計之賈數其困廩籍其囊橐稊米尺帛罔有遺漏故於古人詩文尺牘輒能詳歲月之元後徵地里之南北讀者遂

若置身當時不止諷解文義此豈循文逐句漫事涉獵而能然哉嘗竊歎今之學者務華而絕根逐流而忘源俯拾仰取爲不終日之計讀其文燦然滿紙叩其中藏則楞如也殆所謂文章日工而道將散者乎予於壬子癸丑之間得唐類函驚其華瞻讀之頗酣先生進而教之曰此應敵簡閱之書咿哦沈酣豈應執此因爲言六經指歸及史漢歐蘇文章大槩予謹識之尙不能隅反今墓木已拱音徽如昨反覆斯言其安能再聞乎是編徵奇集異燦然炫日出之紙貴祕之枕函人有同好然吾恐以是編求先生先生隱矣珠生於海執一夜光而

曰海在是及泛海而驚之木生於山執一枝而曰山在是及登山而詫之夜光非不寶一枝非不材而詎若涉山海之全乎故吾序是書而因以明先生之學令世之讀者知所歸也崇禎庚辰孟秋弟志慶題於槐蔭堂

A large empty rectangular frame with vertical lines, likely a placeholder for a table of contents or a list of entries.

序

表異錄二十卷玉峯王先生淑士所輯崇禎時先生之弟志慶敘而刻之稱其徵奇集異燦然炫目錢虞山金陵雜題有鉤動花飛之句蓋採集中語也舊本卷帙零星脫誤頗多讐校數過彙付劄氏先生讀書嗜古才名與李長蘅相伯仲虞山曾贈句云紅藥授書懷北郭青燈讀易想南園其傾倒至矣所著又有史商說刪諸書近漁洋山人居易錄載其史論數則卓識允超千古讀是編者以是爲嘗鼎一臠可耳康熙戊子冬鹽官陳世修

王淑士墓誌銘

余爲諸生時與嘉定李流芳長蘅崑山王志堅淑士交  
已而與長蘅同舉於鄉萬歷庚戌與淑士同舉進士三  
人者器資不同其嗜讀書好禪說標置於流俗勢利之  
外則一也長蘅沒余哭而銘之今又哭吾淑士而其子  
又以銘爲屬嗟乎余衰遲無用久居此世天其憇遺之  
以銘吾友乎其可哀也已淑士初任戴冠其字曰弱生  
與長蘅同研席爲詩文已知法唐宋名家而深鄙嘉隆  
之剽賊塗墍者以爲俗學窮經辨志有古先儒者之風  
及官南駕部雅不欲以游聞談讌把翫日月而又謂隨

俗詩文徒以勞神譁世非有志者所爲乃要諸同舍郎  
爲讀史社九日誦讀一日講貫移日分夜矻矻如諸生  
時少閒借金陵焦氏藏書繕寫勘讐盈箱堆几嘗爲詩  
懷長蘅曰一編餘故篋字畫麻姑細彷彿共丹鉛深夜  
重門閉亦自狀其居官况味如此也通籍二十餘年服  
官僅七載後先家居薄榮進寡交游壹意讀書而其讀  
書最爲有法先經而後史先史而後子集其讀經先箋  
疏而後辨論讀史先證據而後發明讀子則謂唐以後  
無子當取說家之有裨經史者以補子之不足讀集則  
刪定秦漢以後古文爲五編尤用意於唐宋諸家碑誌

援据史傳摭採小說以參覈其事之同異文之純駁蓋  
淑士深痛嘉隆來俗學之敝與近代士子苟簡迷謬之  
習而又恥於插齒牙樹壇墀以明與之爭務以編摩繩  
削爲易世之質的其自任最重讀佛書研相而窮性闡  
教而闕宗手寫華嚴至再著太上感應篇續傳以輔翼  
因果之書間以楮柱世之盲禪而不輕與之辨駁亦此  
志也南駕部秩滿陞僉事提學貴州辭疾不赴用言者  
薦起浙江以母憂歸再起提學湖廣卒於官淑士恂恂  
體若不勝衣居官執法屹然如山南駕部典司勘合不  
以片紙假人所至守律令謝請託理冤抑問疾苦手削

爰書雖老於文法者無以過其在浙也議鹽法者欲行  
温州票鹽以佐餉議水利者欲盡墮諸壩客艘直達會  
城皆名美而實不便力陳其不可而止其奉職循理不  
欲爲好名生事皆此類也督楚學惇行崇禮好古教化  
楚士聞其公而喜覩其明而服習其反覆教誨出於至  
誠莫不洗心回面誓不忍負方奉旨紀錄爲海內學政  
第一而竟以勤其官死嗚呼其斯以爲文學政事彬彬  
文質之君子歟往長蘅語余子才高意廣近於通淑士  
小心精潔近於固我通不及子固不及淑士然居二子  
之間者必我也今長蘅之風流儒雅與淑士之束修好

古皆足以傳於後世而余獨棲遲連蹇老而無成執筆  
而志其葬其能無愧色已乎王氏出琅琊十六世祖某  
爲崑山州學正始家於崑曾祖諱三錫知河南光州祖  
重鼎贈奉直大夫父諱臨亨知杭州府母張氏生三子  
淑士其長也仲志長季志慶皆舉於鄉以文行有聞妻  
朱氏封安人子四人偕偕皆有聲膠序而衍尙幼一  
女嫁顧錫眉淑士卒於崇禎六年八月八日年五十有  
八次年十二月葬吳縣西山之眞珠塢銘曰  
鄧尉之山有宅一區君今葬焉空山老屋梅花千樹礪  
戶依然展如之人焚膏宿火落月殘編我懷君詩南園

墓誌銘  
北郭竊比前賢鈞玄提要著書滿家朱黃駢闐以方水  
心次則石礪誰曰不然過而式者徵於斯銘後千斯年

表異錄目錄

卷一

天文部

象緯類

歲時類

災祥類

祭禱類

卷二

地理部

邑里類

山川類

卷三

人物部



親戚類

帝王類

士庶類

卷四

宮室部

宮殿類

室堂類

卷五

器用部

總載

卷六

音樂部

總載

卷七

軍旅部

總載

卷八

植物部

蔬穀類

花果類

卷九

動物部

羽族類

毛蟲類

表身錄 目錄

借陰軒叢書

蟲魚類

卷十

人事部

賢愚類

寵辱類

言動類

身體類

凶喪類

衣服類

飲食類

卷十一

國制部

總載

卷十二

職官部

總載

卷十三

刑法部

總載

卷十四

錢幣部

總載

卷十五

藝文部

總載

卷十六

仙趣部

總載

卷十七

佛乘部

總載

卷十八

棲逸部

總載

卷十九

技術部

總載

卷二十

通用部

駢語類

虛字類

表異錄卷一

三原李錫齡孟熙校刊

明珠塢山農王志堅輯

天文部一 象緯類

袁宏與范曾書四海鼎沸天轡將移魏都賦曰天宇駭地廬驚

潛夫論世主欲無功之人而強富之則是與天鬪也况使無德之人與皇天鬪而欲久立自古以來未之嘗聞也又曰民安樂則天心總天心總則陰陽和天鬪天總語皆奇 嘗聞一作嘗有則天心總下一有聚也兩字

王彪天賦曰溥為地蓋浩作星衢晉書帝呼天為碧翁

天文錄曰天如欹車蓋南高北下

抱朴子曰宣夜說天了無質仰而瞻之高遠無極蒼蒼然也譬遠望黃山皆青俯察千仞之谷而黝黑

唐詩殘霞蹙水魚鱗浪薄日烘雲卵色天東坡詩笑把鷗夷一尊酒相逢卵色五湖天正用其語

江賦曰類胚渾之未凝象太極之構天

天形穹窿如笠而冒地之表浮元氣之上譬覆匳以抑

水而不流者氣充其中也

虞聳窮天論

屏翳雨也豐隆雷也飛廉風也列缺電也

霜為威屑露為教水霧為迷天步障

日有九芒月有十芒方諸巫有服日月芒法

杜詩日腳下平地李賀詩露腳斜飛濕寒兔喻鳧詩雁

天霞腳雨東坡詩月腳垂孤光

淮南子至於淵虞是謂高春頓於連石是謂下春梁元

帝詩暮春多淑氣斜景落高春唐薛能詩隔溪遙見夕

陽春

頓於連石一作至於連石注連讀腐爛之爛

淮南子曰至於鳥次是謂小還至於女紀是謂大還

莊子曰方中方睨衍義云日斜如人睨目楊用修詩渴

虹下飲玉池水睨日橫分蒼嶺霞渴虹睨日皆奇

李長吉詩羲和騁六轡晝夜不會閑彈烏崦嶺竹扶馬

蟠桃鞭

符瑞圖曰二黃人守者外國人來降宋景文詩青帝回風還習習黃人捧日故遲遲

江淹詩屬我噬景半賞爾若光初噬景晦噬之景若光若木之光也

陸機演連珠利眼臨雲不能垂照朗璞蒙垢不能吐輝註利眼目也天有日猶人有眼目故以日為利眼

海賦翔陽逸駭於扶桑之津註翔陽日也廣雅云日一名朱光張孟陽詩朱光馳北陸

謝瞻詩扶光迫西汜歡餘宴有窮謝眺詩馳暉不可接

何況隔兩鄉又詩過客無畱軫馳暉有奔箭

謝惠連詩頽魄不再圓傾羲無兩旦

易傳曰日者眾陽之精內明立黃五色無主以象人君精精似青翼翼似黑立立似赤編編似白煌煌似黃光照無主不可以一色名也

易乾鑿度日月三日成魄八日成光蟾蜍體就穴鼻始明穴鼻兔也

淮南子云月御曰望舒亦曰纖阿

漢志死霸朔也生霸望也霸音魄月始生霸霸然也霸一作

非音魄作古魄字

謝莊月賦曰若夫氣霽地表雲斂天末洞庭始波木葉  
微脫列宿掩縹長河韜映柔祇雪凝圓靈水鏡連觀霜  
縞周除冰淨歌曰美人邁兮音塵闕隔千里兮共明月  
孝經內事曰昆弟有親親之恩則鈞鈴不離房

淮南子流星色赤名曰地雁其所墜者起兵流星有光  
青赤名曰天雁軍甲之精華也

流星一作沆星色赤一作色青赤○軍甲一作

中軍大象賦云斂明光被填逆水府洪波滔天功隆大禹註  
昔堯遭大水填星逆行入水府

畢為天網主網羅無道之君故武王伐紂上祭於畢求

助天也

後漢蘇竟傳

漢書曰項羽救鉅鹿枉矢西流枉矢所觸天下之所伐  
射滅亡象也觀象賦曰恆不見以周衰枉蛇行而秦滅  
廣雅云勞惑謂之罰星杜牧孫子註云歲為善星不福  
無道火為罰星不罰有德

天文錄曰輔一星附北斗杓第六星大臣之象也占欲  
其小而明若大而明則臣奪君政若小而不明則臣不  
任職○又曰杓三星在箕南主春杓之用占若其縱則  
為豐若其橫則為饑

又曰五星反羽其下之國不可久處反羽者光芒上大

下小狀如反羽也

王勃益州夫子廟碑高車南指遁七曜於中階華蓋西臨藏五雲於太甲張燕公讀之不解訪之一行言北斗建午七曜在南方有是之祥無位聖人當出華蓋以下卒不可悉高一本作帝午一本作五

能占算星辰曰善為星出翟方進傳

離瑜星名微則後宮儉明則後宮奢

六朝文二咸防奢七公理獄二咸七公皆星名

杜牧傳疫病曰大陵之氣大陵星名

天文志辰星過太白閒可械劍械音函容也其閒可容

一劍

格澤星名大人賦建格澤之修竿儲光義詩格澤為君

駕

易通卦驗曰冬至初陽雲出箕如樹木之狀立春青陽

雲出房如積冰春分正陽雲出軫如白鶴穀雨太陽雲

出張如車蓋立夏初陰雲出觜如赤珠夏至少陰雲如

水波寒露正陰雲如冠纓霜降太陰雲出上如羊下如

蟠石易通卦驗曰冬至初陽雲出箕如樹之狀立春少

蟠石陽雲出房如積水春分正陽雲出軫如白鶴一作

鶴謝朓詩鶴雲且起穀雨太陽雲出張如車蓋立夏初

陰雲出觜赤如珠一云赤如纓夏至少陰雲出參如水

波寒露正陰雲出鬼上如羊下如蟠石



兵書曰韓雲如布趙雲如牛楚雲如日宋雲如車魯雲

如馬衛雲如犬周雲如輪秦雲如行人魏雲如鼠齊雲

如絡越雲如龍蜀雲如囿秦雲如行人下一作佳人又作美人

荀子雲賦託地而游字友風而子雨

陸機雲賦曰若秬鬯揚芒嘉穀垂穎

張野廬山記云天將雨有白雲亘中嶺俗謂之山帶春

秋感精符云冬至有雲迎送日者來歲美詩人冬至用

書雲事蓋本此一作天將雨則有白雲

曹子建有吹雲贊言雲如吹綸絮也有雕雲符瑞志雕

雲自成五色儀鳳暗合八音又云雕雲素靈發祥漢氏

有泄雲蜀都賦窮岫泄雲日月恆翳杜詩泄雲行清曉

有蘭雲南齊書曰於蘭雲中簿半暈有覆車雲京房易

占云黃雲如覆車為大豐華嚴經有妬羅雲謂雲如羅

也有樓閣雲虞邵庵詩手攬華鬢結化為樓閣雲五行

志有散鬢雲如亂髮也

管子雲平而雨不甚無委雲則遯已

宋書符瑞志榮露騰軒蕭雲掩閣緯書曰榮光冪河休

氣四塞天地訢合乃降甘露是謂榮露尚書大傳蕭索

輪囷是謂卿雲温子昇詩桐華引仙露槐彩麗卿煙皆

用此

舟人占雲若砲車起則有暴風張文潛詩喜逢山色開  
眉黛愁對江雲起砲車

韓文雲陰解駁日光穿漏袁翻思歸賦駭霞兮絳霧

清明雨為潑火雨立夏雨為隔轍雨見退齋雅開錄

鸛雀羣繞旋飛謂之鸛井必有風雨出酉陽雜俎

蟻封戶天將大雨出易林

瑣碎錄閩俗立冬後遇壬日謂之入液至小雪出液得

雨謂之液雨百蟲飲此水而蟄又謂之藥雨林公弁詩

液雨初生小院寒

嶺南異物志云蠻烟蜃雨無別朝暮

朝暮一作晨暮

田家以晝晴夜雨為夜春

漢書曰董仲舒為江都相以春秋災異之變推陰陽所

以錯行故求雨閉諸陽縱諸陰其止雨反是

法言曰震風陵雨然後知廈屋之為弊幪也

木華海賦崩雲屑雨泔泔汨汨

焦明至為雨備水鳥也

東動聲儀

許慎曰黑蜨神蚪潛泉而居將雨則躍

淮南子曰朱鼈浮於波上必大雨

段成式詩不願石郎戴笠難甘玉女披衣顧野王輿地

志曰萍鄉西津有玉女岡天將雨石閒擁五色立雲俗

名玉女披衣

披衣一作披蓑

晉李暹詩黜霽重雲蔭碎稜震雷吒吒字奇

春雷初起其音格格霹靂者所謂雄雷旱氣也其鳴依

依音不大霹靂者謂之雌雷水氣也

見師曠占

瑜次之山有鳥名橐蜚服其毛羽令人不畏雷

大人賦貫列缺之倒景服虔曰天閃也

大荒之中有山曰鞠陵山有人名曰折丹處東極以出

入風

兵書云風從震來名嬰兒風管公明言樹上已有少女

微風其雨應至矣

文心雕龍云尙書大傳有別風淮雨卽烈風淫雨

李賀詩門前流水江陵道鯉魚風起芙蓉老九月風也

昌黎詩雪霜刻以慘獰颯摺空衢獰颯惡風也

周處周土記曰五月風發六月乃止俗號黃雀風時海

魚變爲黃雀因以名之

仙人亦重雪號爲天公玉戲

雪詩還如驅玉馬暫似獵銀獐

謝惠連雪賦曰其爲狀也散漫交錯氛氳蕭索藹藹浮

浮瀟瀟奕奕聯翩飛灑徘徊委積始緣薈而冒棟終開

簾而入隙旣因方面爲珪亦遇圓而成璧眇隰則萬頃

同縞瞻山則千巖俱白於是臺如重壁達似連瑤庭列瑤階林挺瓊樹皓鶴奪鮮白鷗失素

趙飛燕通鄰人羽林射鳥者露立戶外風雪大作飛燕閉息順氣體無軫粟

常袞賀雪表云重雲益固應水澤腹堅之時積潤潛通迎土膏脈起之候

先民有言明出乎幽著生乎微故宋井之霜以基昇正之寒黃蘆之萌以兆大中之暑

中論疑霜封樹謂之木冰亦名樹介寧王憲有疾見而歎曰此俗所謂樹嫁者也吾其死矣諺曰樹嫁達官怕

出唐書

詩人稱天河曰銀河銀潢銀漢皆常語也李賀曰銀灣

江淹曰繩河緯書曰王者有道則河直如繩謝朓詩華

漢淳虛用詩雲漢昭回之意陸龜蒙云繩河裏扇月旁

春秋緯云武露布文露沈註曰甘露降其國布散者人

尚武沈重者人尚文

春秋緯云一作春秋緯曰

流甘委素玉潤冰鮮蜜房下結珠琲上懸

邢子才甘露頌

上立乃顧神物薦委飛甘灑潤玉散珠連昔魏明仙掌

竟無靈液漢武金莖空望雲表豈若神漿可挹流味九

戶之前天酒自零凝照三階之下

李德林甘露表

虹曰天弓亦曰帝弓見白虎通又名天忌禮記曰虹者

天地訖潰之氣也又曰水椿

爾雅蜺為挈貳註蜺雌虹也挈貳其別名

關中謂雹曰白雨紹興中大雨雹太學屋瓦皆碎官申  
修補不敢言雹稱為硬雨

天文部二 歲時類

莫莢一名歷莢亦名仙茅

爾雅夏為朱明亦曰長贏楚辭收恢台之盛夏太玄經

註萬物豐於纁夏耗於玄冬 一作收恢台之孟夏注  
夏以長物恢台長養也

照姬乎春曦彤乎夏

古者諸侯迎春於東郊齊曰放春見管子楚曰發春見

楚辭漢書太守有行春班春之文

魏董遇字季真從學者苦渴日遇言當以三餘夜者日  
之餘冬者歲之餘風雨者時之餘渴日可對競辰

每月五日皆可稱端五見容齋隨筆冬至前一日亦可

稱除夕見陸務觀筆記三月三日可稱重三見野客叢

書

范子計然曰日者寸也紀刻而成晷也月者尺也紀度  
而成數也

淮南子名曰圭為影柱廣雅云晷柱掛影陸龜蒙冬日

詩日光走冷圭

日未俄言日未昃也俄暑猶言寸陰也天官書熟五斗米頃李商隱李賀小傳如炊五斗黍許時戰國策堯見舜於草茅之中桑蔭不移而授天下又列子曰堯之知舜不違桑陰長楊賦日未靡旃王莽傳轉漏之間谷永傳當陽數之標季註陽九之末季也

楊震傳車駕行還便時太學註於太學待吉時而後入也

夏小正語有新異者如農緯厥耒緯束也立春先時命農大夫咸勸農用也囿有見韭見露也農及雪澤及言汲汲也漢案戶漢天河案戶直戶也古者戶皆南向是

時初昏天漢直南也烏浴浴者飛乍高乍下也玄駒賁玄駒蟻也賁走於地中也

唐六典春升寅階夏升亥階

漢詔曰方春生養萬物葶甲

淮南子二月之夕女夷鼓歌以司天和註云女夷春夏長養之神也

除日進儺內二人名儺公儺母漢書滅逐疫振子之半

一作歲除日進儺內  
二老人為儺翁儺母

世謂正月三日為田本命浙西人謂之夏正三言夏正之三日俗以是日稱水以重為上有年

四月爲麥秋見蔡邕月令章句

五月五日爲地臘出道書

宋人賀正旦啓云瑞霽饑臘粉荔迎年洛陽人以正旦造粉荔枝

左傳曰浹辰之間楚克其三都辰指十二辰自子至亥也周禮天官曰挾日而斂之以甲至甲爲挾日凡十一日也揚雄疏近不過旬月之役遠不過二時之勞翟方進爲丞相司直旬歲閒免兩司隸謂滿月滿歲也車千秋旬月取宰相則又謂十閱月也  
四民月令四月是謂乏月冷穀旣盡宿麥未登

開元高太素隱南山起六逍遙館各製一銘冬日初出  
銘曰折膠墮指夢想負背金鑼騰空映檐白醉樓攻媿  
嘗取白醉名閣

阮籍詩陽和微弱陰氣竭海凍不流絲絮折庾肩吾詩  
勁氣方凝海清威正折絲張說詩塞上絲應折江南草  
可結山谷詩霜威能折絲風力欲冰酒

蕭辰秋日也出選詩

唐書武后遣暑三陽宮遣卽避也二字新

續錦帶集紅鏡開炎耀晷方畏宋人秋日書啓金鞵秩  
序玉宇剪涼韞與孳同

王晏詩槐序候方調指夏日也

何遜詩麥氣始清和謝朓詩麥候始清和王介甫用之

曰晴日暖風生麥氣

謝靈運詩秋岸澄夕陰火旻團朝露又云述職期闌暑

理棹變金素盧植詩祝融解炎轡尊收起涼駕范絳詩

戊日辭巢燕商天向浦鴻

東京賦日月會於龍虺恤民事之勞疚虺音鬪龍尾星

也日月會於尾十月時也民勞於歲事故天子當於此

時愍恤勞來之

唐詩春寒側側掩重門王介甫側側輕寒翦翦風許奕

小辭玉樓十二春寒側呂聖求詞側寒斜雨

閏月為叢殘之數出穀梁傳註

公羊傳提月六鷁退飛過宋都提月者何僅逮是月晦

日也

聖人觀四時之變刻玉紀其盈虛察五行之聲鑄金均

其清濁所以遂八風而宣九德和大樂而成政道晉律志

淳古葦籥創觀人籟之源女媧笙簧仍昭鳳律之首伶

倫含少乃擅比竹之工虞舜昭華方傳刻玉之美隋律志

劉歆鍾律書云春宮秋律百卉必彫秋宮春律萬物必

生舜時西王母獻昭華之瑄以玉為之



榮夏宮冬律雨雹必降冬宮夏律雷必發聲隋牛弘傳  
隋劉炫上太子啓曰自木鐸寢聲緒言成燼羣生蕩析  
諸夏沸騰曲技雲浮疇官雨絕

大象元年太史上士馬顯等上景寅元歷奏曰臣案九  
章五絕之旨三統四分之說咸以節宣發斂考詳晷緯  
布政授時以爲皇極者也而乾維難測斗憲易差盈縮  
之期致舛咎徵之道斯應寧止蛇或乘龍水能沴火因  
亦玉羊掩曜金雞喪精王化關以盛衰有國由其隆替  
歷之時義於斯爲重自炎漢已還迄於有魏運經四代  
事涉千年日御天官不乏於世命元班朔互有沿改驗

近則疊璧應辰經遠則連珠失次義難循舊其在茲乎  
臣等監考疏密共定今術開元發統肇自景寅至於兩  
曜虧食五星伏見參校積時最爲精密庶鐵炭輕重無  
失寒燠之宜灰箭飛浮不爽陰陽之度隋歷志

究天道之精微開日官之軌憲容成再出不能添累黍  
之功壽王重生無以議分毫之失豈比夫時乖兩閏始  
載鄒人之語亥有二首方聞絳老之年李嶠神龍歷序

陸機刻漏賦伏陰蟲以承波吞絇流其如挹孫綽銘靈  
蚪吐注陰蟲承瀉註蝦蟇也

天文部三 災祥類

梁簡文啓將恐督郵不除失在汝南之守曝齒未收無傷河南之尹

盛弘之荊州記云狼山縣有山獨立有二大石其門相去丈許俗名其一為陽石一為陰石水旱為災鞭陽石則雨鞭陰石則晴

古者穀不登虧膳災屢至損服凶年不墜塗泥屋也

甘泉賦郵肩錫羨註錫與也羨饒也言神明饒與福祥也河東賦發祥隕祉註隕降也

陳忠疏曰今天心未得隔并屢臻註并必姓翻隔并謂水旱不節也

涌趨邪陰湛溺太陽李尋語

谷永傳曰末殺災異滿闕誣天滿闕欺罔也

公羊傳大災者何大瘡也註民病也

穀梁傳一穀不升謂之饑三穀不升謂之饑四穀不升謂之歉

天文部四 祭禱類

爾雅祭山曰廋縣祭川曰浮沈祭星曰布祭風曰磔是禱是禱師祭也既伯既禱馬祭也

管子秋至而禾熟天子祀於太崧崧與歲蕤字義音同歲蕤歲垂也秋至百穀成而草木垂故祀之

郊祀志上宿郊見通權火註權舉也凡祭祀通舉火者或以天子不親至祠所而望拜或以衆祠各處欲其一時薦饗故以火爲之節度也

凡祭灌鬯求諸陰蒞蕭求諸陽蒞而悅切與燕同

祭宗廟物曰縮鬯蕭艾

出潘岳

温祭物曰鞞俎

出儀禮鞞音尋

漢文帝作顧成廟言制度卑狹若顧望而成也漢諸帝皆有廟景帝號德陽武帝號龍淵昭帝號徘徊宣帝號樂遊元帝號長壽成帝號陽池

班固傳啓恭館之金滕註恭肅之館謂廟中也金滕以金緘匱藏符瑞之書於其中也

三禮義宗云雩祈雨之祭禁止雨之祭

表異錄卷一終

表異錄卷二

三原李錫齡孟熙校刊

明珠塢山農王志堅輯

地理部一 邑里類

杜篤論都賦雍州本帝王所以育業霸王所以衍功戰  
士角難之場也關梁之險多所衿帶一卒舉礪千夫沈  
滯肇十有二是為瞻腴

西都賦曰華實之毛則九州之上腴焉防禦之阻則天  
地之隩區焉

周公將致政南繫於洛水北因乎剡山以為天下之大

湊 周書作  
雜解

薛宣傳谷永疏薛宣為御史中丞執憲轂下任昉竟陵王傳神臯載穆轂下以清轂下猶輦下也

城上垣謂之睥睨言於孔中睥睨非常也亦曰陣言裨助城之高也亦曰女牆言其卑小比之於城若女子於丈夫也

呂溫受降城銘云俯視陰山仰看昭回一夫登陴萬里洞開封張仁愿制云橫卻月於天街劃長雲於地脈周禮形方氏掌邦國之地域而正其封疆無有華離之地註析而不絕為華絕而不續為離華音夸

周禮土訓掌道地隱以辨地物誦訓掌道方隱以詔避

忌地隱如磽确之地不宜稼穡斥鹵之地不宜果蓏是也方隱一方之瘴烟厲氣

後梁為北魏影國猶云附庸

衢國言衝要也

荆公詩臥占寬閒五百弓又詩曰白下亭東鳴一牛又潮溝直下兩牛鳴蓋佛家以四肘為弓肘一尺八寸四肘蓋七尺二寸又拘廬舍者謂大牛鳴聲所極聞杜詩葭萌氏種迴左擔犬羊屯李克蜀記云蜀山道徑險窄擔負者不容易肩謂之左擔道

趙州石橋望之如初月出雲長虹飲澗

宋書西陽王子尚言湖山之禁云嵐山封水保為家利  
嵐燎除旁草也

交鄉寫佃如今之遠莊寄業出王伯淮奏議

周禮疏有陰臯陽臯以淺深向背言也

燒田而種曰膠故野燒曰膠火

田塍曰水埒

唐書南詔傳官給田四十雙蓋二百畝也五畝為雙陶

南村謂一雙為四畝

古歌高田種小麥稔穰不成穗男兒在他鄉安得不憔悴

悴

三都賦林藪石畱而蕪穢石畱言土地多石如人之有

畱結也戰國策成臯石畱之地無所用之賦本此

五姓祕要相山之法欲如生蛇之渡水又欲如啄木之

飛翔生蛇渡水取其詰屈啄木飛翔取其一高一下

昭明太子葬母有道士云此地不利長子若厭之或可

申延厭厭勝也

胡建傳時監軍御史為姦穿北軍壘垣以為賈區建斬

之以奏註坐賣曰賈為賣物之區也

何進馳從僂道歸營僂任鑿反疾也

目語額瞬言市人精點也出成伯陽

去中土之肥饒寄不毛之荒極楊終語

烏孫康居奄蔡大月氏皆行國隨畜牧

主父偃傳匈奴獸聚而烏散從之如搏景

晉書慕容氏邑於紫濛之野故宋人送使契丹詩多用

此二字

韓安國言匈奴自古不屬為人言不內屬於漢為人

也

譯語人曰象胥又曰舌人蠻夷贖罪貨曰賧土貢曰飛

苞驛籠

西南夷蠻名渠帥曰精夫相呼為妣徒

羌胡傲腸狗熊臣不能禁止

董卓語

武帝征伐匈奴二十餘年匈奴馬畜孕重墮殞罷極苦

之註孕重懷妊者也墮落也殞敗也

魏主遺宋文帝書我今北伐先除有足之寇註柔然多

馬故言其有足臧質與魏主書亦云爾自恃四足

元魏都洛諸夷侍子春去秋來謂之雁臣

桓譚新語荊州有鼻飲之蠻南城有飛頭之夷

文選夷狄以蒸報為仁義註上淫曰蒸下淫曰報

唐書裴行儉討遮旬春築碎葉城面三門紆環多趣以

詭出入西域胡縱觀莫測其方略

東夷傳馬韓人大率皆魁頭露紒註魁頭猶科頭也謂以髮縈繞成科結也紒音計

匈奴盛時役屬西域置僮僕都尉以領西域蓋以僮僕視西域也

鞏庭虜庭也出南史亦云毳幙

鹽鐵論匈奴利則虎曳病則鳥析

匈奴傳匈奴有斗入漢地直張掖郡

地理部二 山川類

鞏氏耳目志云海山微茫而隱見江山嚴厲而峭卓溪山窈窕而幽深塞山童頽而堆阜

梁宣帝七山寺賦神崑崙而獨立仙的皎皎以孤臨壑之凸凹者曰巒峯之尖射者曰的

南州異物志云合浦之人習水善游上視層潭如猿仰株入如沈鼈出如輕鳧蹲泥剖蚌潛竊明珠游音於

正月解凍水二月白蘋水三月桃花水四月瓜蔓水五月麥黃水六月山礬水七月豆花水八月荻苗水九月霜降水十月復槽水十一月走凌水十二月蹙凌水楊誠齋擬大招懷東坡辭歷九州而猶礙兮誕置之祝融之汪謂南海也左傳雍氏之汪服虔註停水曰汪晉戴洋謂庾亮曰武昌山作八字數不及九昔吳用王



寅來上己酉下還秣陵陶公亦涉八年盛衰有數不可移也潘邠老江口詩曰八字山頭雁武昌江上魚

陸魯望云金華山枝峯蔓壑秀氣旁魄不啻神仙登臨瀟山三峯鼎峙拒雲槩日

桂林之山玉笋瑤簦森列無際

王涯仙掌辯云銳而出者爲虎牙尖而背者爲熊耳角而巘者爲牛首冠而峭者爲雞頭

慎子曰治水者茨防決塞雖在夷狄相似如一學之於水不學之於禹也茨防卽今黃河之埽也

三秦記龍門之險懸船而行

元微之送客游嶺南詩波心擁樓閣規外布星辰自註交廣閒南極漸高北極凌低規度外星辰至衆如五曜者皆不在星經

君山一名媧宮武當山一名參嶺普陀山一名梅岑青

城山一名天谷大復山一名胎簪衡山一名芝岡武夷

山一名幔亭

盛弘之荊州記記沮水幽勝云稠木旁生凌空交合危

巘傾岳恆有落勢風泉傳響於青林之下巖猿流聲於

白雲之上游者常苦目不周翫情不給賞

巘或作樓

李益詩胡風凍合鷓鴣泉牧馬千羣逐暖川暖川可對

熱海皆胡地之水冬日少不凍非真暖熱也

韓退之詩懸瀑垂天紳孟郊詩檐溜擲天紳東坡詩餘波猶足掛天紳子由詩蒼壁立積鐵懸泉瀉天紳謂瀑布為天紳甚奇

稚水蒙流水經註

軟灘嫩堰出宋河渠志

大戴禮以丘陵為牡谿谷為牝古詩云哀壑叩虛牝韓退之詩可憐無補費精神有似黃金擲虛牝

江賦隨風猗萎與波潭沲註潭沲隨波之貌沲徒我切

梁簡文詩潭沲青帷閉玲瓏朱扇開富嘉謨詩陽青二

月朝始暎春光潭沲度千門

惠州佛疏院東則熱泉湯如也西則冷泉雪如也又地理志論水性之別如庭州灞水金鐵皆漏鄜延之川石脂流煙弱水溺毛黑溪玄贛悉唐制角畔怯腐手其不同有如此

真誥云金陵者洞虛之膏腴句曲之地肺註云水至則

浮故曰地肺

大懷山為地喉可對天目又岐山為地乳

雲溪友議山中有玉者木旁枝下謂之寶苗

東京賦鳴女牀之鸞鳥舞丹穴之鳳凰註女牀山名

焦氏易林江河淮海天之奧府又易林占變江河淮海

天之都市

漢文帝臨廁韋昭所謂夾二水而臨其岸也慎夫人如廁與武帝據廁見衛青溷廁之廁也

謝靈運羅浮山賦朱明之陽宮耀真之陰室洞穴之寶

衢海靈之雲術

拾遺記方丈之山一名巒雉

泰山一名天孫言為天帝孫也博物志

湘水出自陽朔至清深五六丈下見底了了然石子若

擣菹白沙如霜雪赤岸若朝霞羅含湘川記

山峯之上立石數百丈亭亭桀豎競勢爭高遠望參參若攢圖之託霄上其下層巖峭舉壁岸無階縣巖之中多石室焉若有積卷矣而世士罕有津逮者因謂之積

書巖水經註

孟門即龍門之上口也實謂黃河之巨阨兼孟津之名矣此石經始禹鑿河中漱廣夾岸崇深傾崖返捍巨石臨危若墜復倚古之人有言水非石鑿而能入石信哉其中水流交衝素氣雲浮往來遙觀者常若霧露沾人窺深悸魂其水尚崩浪萬尋縣流千丈渾洪鬩怒鼓若山騰濬波頽疊迄於下口方知慎子下龍門流浮竹非

駟馬之追也

入南出一里至天井井裁容人穴空迂迴傾曲而上可  
高六丈餘山上又有微涓細水流入井中亦不甚沾人  
上者皆所由涉更無別路欲出井望空視明如在室窺  
窗也出井東南行二里峻坂斗上斗下  
孟門東南有平山水出於其上潛於其下又是王屋之  
次疑卽平山也其水南流歷鼓鐘上峽懸洪五丈飛流  
注壑夾岸深高壁立直上經崖秀舉百有餘丈峯次青  
松巖懸巖石於中歷落有翠柏生焉丹青綺分望若圖  
繡矣

其山石岸絕嶮壁立天固崖半有一石室去地可五十  
餘丈爰有層松飾巖列柏綺望唯西側一處得歷級升  
陟

南峯北嶺多結禪棲之士東巖西谷又是剎靈之圖竹  
柏之懷與神心妙遠仁智之性共山水効深

又逕七賢祠東左右筠篁列植冬夏不變貞萋

丹水又東南歷西巖下巖下有泉涌發洪源巨輪淵  
深不測蘋藻冬芹竟川含綠雖巖辰肅月燕麥暄萋  
廣昌縣東南郎山東北燕王仙臺東臺有三峯甚爲崇  
峻騰雲冠峯高霞翼嶺岫壑沖深合煙罩霧蒼舊言燕

昭王求仙處

秀郭分霄層崖刺天

山岑競舉若豎鳥翅立石嶄巖亦如劍杪

池在山原之上世謂之天池方里餘其水澄渟鏡淨而

不流若安定朝邦之湫淵也清水流潭皎焉冲照池中

嘗無斥草及其風澤有淪輒有小鳥翠色投淵銜出若

會稽之私鳥也

私鳥當作私鳥

自西域涉黃金峭寒泉嶺陽都坂峻嶒百重絕日萬尋

既造其峯謂已踰崧岱復瞻前嶺又倍過之言陟羊腸

超煙雲之際顧看向塗杳然有不測之嶮

其下十餘里有大巫山非唯三峽所無乃當抗峯岷峨

偕嶺衡疑其翼附羣山並縈青雲更就霄漢辨其優劣

耳

自三峽七百里中兩岸連山略無闕處重巖疊嶂隱天

蔽日自非停午夜分不見曦月至於夏水襄陵沿汭阻

絕王命急宣有時朝發白帝暮到江陵其間千二百里

雖乘奔御風不以疾也春冬之時則素湍淪潭迴清倒

影絕巘多生檉柏懸泉瀑布飛漱其間清榮峻茂良多

趣味每至晴初霜旦林寒澗肅常有高猿長嘯屢引淒

異空谷傳響哀轉久絕故漁者歌曰巴東三峽巫峽長

猿鳴三聲淚沾裳

下有灘名曰黃牛灘南岸重嶺疊起最外高崖間有色如人負刀牽牛人黑牛黃成就分明既人跡所絕莫得究焉此巖既高加江湍紆迴雖途逕信宿猶望見此物故行者謠曰朝發黃牛暮宿黃牛言水路行深迴望如一矣

官都記曰自黃牛灘東入西陵界至峽口一百許里山水紆曲而兩岸高山重障非日中夜半不見日月絕壁或千許丈其石彩色形容多所象類林木高茂略盡冬春猿鳴至清山谷傳響泠泠不絕所謂三峽此其一也

崧言常聞峽中水疾書記及口傳悉以臨懼相戒曾無稱有山水之美也及余來踐躋此意既至欣然始信之耳聞不如親見矣其疊嶂秀峯奇構異形固難以辭敘林木蕭森離離蔚蔚乃在霞氣之表仰矚俯映彌習彌孫云疑脫佳字流連信宿不覺忘返目所履歷未嘗有也既自欣得此奇觀山水有靈亦當驚知已於千古矣

榛棘蒲薄騰林拂雲幽煙冥緬非生人所安

咸驩已南寧覺滿岡嗚咆命疇警嘯聒野孔雀飛翔蔽

日籠山

林棘荒蔓榛梗冥鬱藤盤筍秀參錯際天

其小水崖罍巖常吐飛溜或雪霏沙漲清寒無底分溪別壑津濟相通

澧水又東茹水注之水出龍茹山水色清澈漏石分沙莊辛說楚襄王所謂飲茹溪之流者也

山中有三精舍高蔓凌虛垂檐帶空俯眺平林煙杳在下水陸寧晏足為避地之鄉矣

江闕漁商川交樵隱故桂棹蘭楫望景爭途

石鼓山有石鼓於星為河鼓星動則石鼓鳴石鼓鳴則秦土有殃鳴淺殃萬物鳴深則殃君王矣

表異錄卷二終

表異錄卷三

三原李錫齡孟熙校刊

明珠塢山農王志堅輯

人物部一 親戚類

宋苕公以宋元憲為宗衮本謝朓以謝安為宗衮謝詩曰阡危賴宗衮微管寄明牧

武后稱剪宗支

高祖微時過其巨嫂食嫂厭之陽為羹盡輟釜註巨大也輟音勞輟也

兩婿相謂為亞江東人呼為僚婿嚴助為友婿所辱註同門之婿也

宋世以駙馬爲粉侯文及甫抵書邢恕謂駙馬韓嘉彥  
兄忠彥爲粉昆

孿子雙生子也

楊修答臨淄侯云君侯忘聖賢之顯迹述鄙宗之過言  
王荆公答劉原文書稱鄙宗夷甫

文選謝惠連詩聊用布親串註串習也

汜毓字稚春濟北廬人敦睦九族時號其家兒無常父  
衣無常主晉書

開元中崔隱甫奏青州北海人呂元膺四代同居至所  
畜牛馬羊狗皆異母同乳請加旌表制許之

宋太原太守顧訓之五代同居家有百口時人重之名

其所居橋曰百口橋

鄭廬李崔皆爲甲族太原王亦四姓之匹而呼爲鈹鏤

王家喻銀質而金飾

公西華之養親也若與朋友處會參之養親也若事嚴

主烈君淮南子

宋王裕之未嘗教子孫學問或問之答曰丹朱不應乏

教甯越不聞被捶前史

孝文臨軒令諸州中正各舉所知陽尼與房千秋各舉

其子帝曰昔有一祈名垂往史今有二奚當聞來牒北史



陳留太守太山吳文章少孤與兄伯武相失別二十年  
後會下伍市爭計共鬪伯武毆之文章欲報心中惻愴  
手不能舉大自怪也因投杖於地還相尋問乃親兄也  
世祖贈到漑到洽兄弟詩曰魏世重雙丁晉朝稱二陸  
何如今兩到復似陵寒竹

梁書

前漢志云見神於先後宛若其註云兄弟妻關中呼爲  
先後退之南山詩或齊若朋友或差若先後宋景濂樓  
母墓版文處先後惟以柔勝皆用此

雖察父愆兄覆育子弟誠無以加也

愆智

對父之舅氏稱彌甥

出左傳

女曰息女

出漢書

五行志處妾遇之而孕註處妾宮中之處女

郊祀志孟康曰兄弟之妻呼爲先後古謂之娣姒今關  
中俗呼爲先後吳楚俗呼爲妯娌

劉向傳臣幸得託肺附註爲如肝肺相附著

鄒陽傳壤子王梁代註梁益之閒所愛謂其肥盛曰壤  
武五子傳曰趙氏無炊火焉註言絕祀也

自稱子曰糞土息出說苑呼人弟曰淑弟出魏文誄

兄弟和曰季有兄心

小姑曰女娒又曰女叔

禮冠儀

女壻曰倩

出漢書

妹壻曰媼

出公羊傳

生子曰挽乳余朱榮欲入朝視皇后挽乳婦人曾產曰

嘗字谷永曰無避嘗字

多妾曰後房多曠積之女任覓常婢市寒賤可制指者

杜牧

不再娶曰不開媵路

公羊

賈敦頤敦實兄弟皆有美跡立碑號常棣碑

沈淡弟深冲皆為御史中丞名譽有優劣人號為腰鼓

兄弟

盧綸作王駙馬花燭詩有人主人臣是親家今人呼親

家親作去聲蓋本此

袁聿修為姨丈人崔休所知賞蓋今之姨夫也

服虔曰民母嫡母也衛青少時民母之子皆奴畜之

漢王莽二年有男子遮立國將軍車曰漢氏劉子與成

帝下妻子也下妻二字奇又元后傳多取傍妻

劉瑜三世同居外無異門內無異煙

京房易傳子孫為寶爻

鄭敬曰今幸得全軀樹類還奉墳墓註樹類謂有盾嗣

沈休文詩曰還家問鄉里詎堪持作夫鄉里謂妻也南

史張彪云我不忍令鄉里落他處

婢妾年久而衰退者謂之房長亦曰房老婢之婢曰重臺羊欣書似婢作夫人米芾學欣書高宗謂米字爲重臺

傅婢註傳曰附謂幸也見王吉傳

唐潞州節度使薛嵩青衣紅線號曰內記室

家語云柳下惠嫗不逮門之女國人不稱其亂荀子柳下惠與後門者同衣而不見疑非一日之聞也惠夜宿於郭門外有女子來天寒乃坐女子於懷以衣覆之二語皆用此不逮門與後門字皆僻荀子舊註非也董仲舒曰天地之氣不致盛滿不交陰陽是以君子甚

愛氣而謹游於房疏春而曠夏澗秋而揆冬

揆字當作睽

荀子冰泮逆女霜降殺內殺音隆殺之殺蓋發生之際合婚姻閉藏之時禁嗜欲也

吳季札聘於鄭見子產如舊相識貽之縞帶子產獻紵衣焉胡叟謂高允曰吳鄭之交以紵縞爲美談吾之於子以韋弦爲幽贊

公沙穆遊太學資乏變服爲傭賃春於吳祐家祐與語大驚遂定交於杵臼之間

人物部二 帝王類

王融疏曰天移雲動勒封岱宗咸五登三追蹤七十集

三燭於蘭席聆萬歲之禎聲豈不遑哉

要略曰禹之治水身執畚插以爲民先當此之時燒不暇攢濡不給挖

尙書帝命驗期曰桀失玉鏡用其噬虎註玉鏡謂清明之道虎謂其暴虐孝經援神契云后偷任威折其玉斗失其金椎註玉斗渾儀金椎言國之寶

法言曰始皇方虎捩而梟磔噬士猶腊肉也

史通曰姬宗之在水滸也鸞鷲鳴於岐山劉姓之在中央也蛟龍降於豐澤

彤雲晝聚素靈夜哭

漢高帝

王莽傳論紫色繩聲餘分閏位註紫閒色繩淫聲也

琅邪王道子亂政陸納望宮闕歎曰好家居織兒欲撞壞之耶

後漢宦者論云魏武因之遂遷龜鼎

朱氏代唐四方幅裂朱邪入汴比之窮新謂有窮新莽也

司馬懿奏曹爽曰天下洶洶人懷危懼陛下但爲寄坐隋元諧欲反使弟滂望氣滂曰瞻雲如蹲狗走鹿不如我輩有福德雲

儒林傳桓靈之間君道秕僻黨錮傳序叔末澆訛王道

陵缺

唐詩欲知皇劫遠初拂六銖衣皇劫卽帝年也

史記世家謂孔子稱文王眼如望羊又漢書註鄭玄謂羊畜之遠視者也

荀子國安於盤石壽於箕翼註箕翼主壽考

朱勃訟馬援書曰夫明主醜於用賞約於用刑

唐文皇虬髯壯冠人號髭聖

杜良作唐太宗畫像贊云仁爐義鞴道薪德火

真冷遺命也莊子山木篇桑扈曰舜之將死真冷禹曰汝戒之哉形莫若緣情莫若率証冷曉也謂以真道曉

語禹也

崔駰西巡頌表曰唐虞之世樵夫牧豎擊轅中韶感於

和也班固集擊轅相杵亦足樂也曹子建書擊轅之歌

有應風雅柳子厚云擊軒拊缶宋景文云壤翁轅童

唐時宮中呼天子爲宅家通鑑韓建發兵圍十六宅諸

王呼曰宅家救兒劉季述等至思政殿皇后趨至拜曰

軍客勿驚宅家唐子西詩宅家喜得調元手

初爲天子後爲人螭崔琦外戚箴語註螭山神獸形以

此比紂之惡也

壺政穆宣房樂韶理坤則順成星軒潤飾

顏延年宋文后哀冊借陰軒叢書

晉書曰作配皇極齊體紫宸象玉牀之連後星喻金波  
之合義璧又曰龍縈結釵宗周鞠爲黍苗燕尾涎災隆  
漢墜其粉社

漢后紀恩隆好合遂忘潛蠹註潛穢也

後周皇后服制受繭則服鷲衣聽女教則服鶉衣歸寧  
則服翎衣鶉音罩翎音秩

許敬宗知武后鉗戾能固主以久已權

唐武后贊斂數神器注盜也

鳴牝構孽紛虹肆災女主之禍

唐人目武后時爲牝朝

春秋感精符曰妻黨翔則有黃雲入國國祲春秋運斗

樞曰九女並訛則九虹並見

后親蠶所駕馬曰驪馬后妃親桑處曰桑壇后飼蠶禮

曰二澗

魏明帝詔錄士女已嫁爲吏民妻者還以配士簡其有

姿首者納之掖庭註首謂鬢髮者

漢後宮位號有名無涓者註涓潔也言無所不涓潔也

二字奇

張茂疏曰况復有掖庭非員無錄之女椒房母后之家  
賞賜橫與其費半軍註非員謂出於員數之外者無錄

謂宮中錄籍無名者

董賢傳召賢女弟爲昭儀位次皇后更名其舍爲椒風以配椒房

齊東昏於宮中爲市使宮人屠沽潘氏爲市令帝爲市

魁明皇遣使擇天下姝好號花鳥使

劉聰以婢爲后王鑒諫曰不可以汗玉簪而塵瓊寢也魏文帝所幸美人薛夜來妙於針功雖處深帷之內不用燈燭裁製立成宮中號爲針神魏秦朗母爲太祖製亦號針神

唐書長孫無忌等贊曰天以女戎閒唐而興非義士抗之以死決不可支

青史子胎教篇曰古者胎教之道王后有身瑞七月而就蓂室太史持銅而御戶左太宰持升而御戶右此三月者王后所求音聲非禮樂則太師撫樂緼瑟而稱不習所求滋味非正味則太宰荷斗倚升而不敢煎調崔季圭諫魏世子好獵勸其燔翳捐褶

教嚴緼瑟禮重吹銅教太子事

太子門戟曰雞戟太子納妃曰龍枕鴨燈

出張敞晉東宮故事

晏元獻謝昇王記室表曰衣存缺衽式贊於謙冲饌去

邪蒿不忘於規諫韓詩外傳周公誠伯禽曰衣成則必  
缺衽宮成則必缺隅

王褒太子箴曰元良繼體麗止離暉秋坊通夢春宮養  
德

梁晉安王上昭明啓曰殿下體高立墮養道春禁牢籠  
文圖漁獵義河褚遂良疏曰周嗣問安三至必退漢儲

視膳五日乃來  
上官儀冊殷王文曰慶表裁梧德成觀梓

陸辰棣王制曰分以白茅錫其朱邸  
唐彭王僅傳周稱百代抑聞麟趾之美漢命六官亦樹

犬牙之制

稱藩王之美曰閒平謂河閒東平也亦曰鄗桂南史鄗  
陽王鏘桂陽王鑠皆齊高帝之子鏘好文章鑠好名理  
人稱為鄗桂

人物部三 士庶類

唐時諸道進闈兒號曰私白

邊人驛卒也 出列

河西節度使崔希逸倸人入奏事註倸從也唐制軍鎮  
大使以下皆有倸人別奏以為之使

諸曹走吏曰鳧雁 後魏道  
武時事



當百軍吏名也五百武校名也

田更言其老而更事也漢有三老五更

褚亮詩彤騶出禁中蓋五百戴紅帽以唱騶自唐已然矣

倪寬受業孔安國貧無資用為弟子都養

王敬則初為散輩使魏散輩謂眾人也

雁戶流民也

出唐書

小兒五歲曰鳩車之戲七歲曰竹馬之遊又撫塵而遊何妥與蘇夔議樂朝廷以夔威子多附之妥怒曰吾席閒函丈四十餘年反為昨暮兒之所屈也

流宄道路

光武詔語宄散也

彫劫之民劫音愧三國志

昭帝紀民匱於食流庸未盡還註謂去其本鄉而為人庸作

劉虞為公孫瓚所殺北州百姓流舊莫不痛惜註流者他州流人舊者舊著籍幽州者也

蔡興對武帝曰陛下自殺賊臣自葬周旋王玄謨責所親故吏曰當艱難時周旋輩無一言相和發者蓋當時自有此語

郭泰傳段干木晉國之大駟註駟儉也

彈王融奏曰招納不逞扇誘荒僮六朝時以北人爲僮荒

邢巒曰蕭深藻是裨屐少年未洽政務

強宗右姓出郭  
汲傳

章服言論與寒細不異

論衡曰藉孺韓嫣形要骨蘭皮媚色稱要與麗同蘭與妍同

元結集諸臣顛官怡愉天顏顛音搵又杜牧樂官曰顛玩之臣

巫覡號曰瑤眊見本草覡音隙

諸事拾遺屬之乳姐傳以潼姆

楚辭此惟倚於彌楹偃促談於廟堂註此惟醜女也

北齊許散愁自少不登變童之牀不入季女之室變童

一云慰子美童也慰一作  
蔥音宰

漢書女師爲戊姆

宋明帝謂褚淵曰吾近危篤故召卿欲使著黃襪耳黃襪者女服也魏靜帝謂崔季舒是我嫺母

婦人見人則道福彼此道勝常王廣津宮辭曰新睡起來思舊夢見人忘卻道勝常勝字作平聲

衆婢出漢樂歌嫺美女也

周文謂尉遲綱曰事平當賞汝佳口謂佳婢也

鬪婦髻名唐詩還梳鬪婦學宮妝

米元章書史云每歲荒及節迫往往使老婦馭攜書畫出售婦馭卽今之牙婆也

陸慎言妻沈慘狡妬慎言委荆氏政不在己吏民號爲  
燕脂虎

說苑以夜繼日男女切躋言舄履交錯也

梁冀妻孫壽性鉗忌能制御冀註鉗鉞也言性忌害如  
鉗之鉞物也

文選旣婉孌乎幽靜兮復婆娑乎人閒音鬼獲女閒靜

也

文選舒詵倩之纖腰

表異錄卷三終

表異錄卷四

三原李錫齡孟熙校刊

明珠塢山農王志堅輯

宮室部一 宮殿類

帝居曰累琅 唐王珪

宮中路曰闡術 魏都賦

帝居牆曰賁庸 尚書大傳註

殿柱曰蒿柱

漢武帝見梁上一老翁放杖稽首而不言東方朔曰此水木之精名曰藻廉夏巢幽林冬潛深河陛下日造宮室斬伐其居故來訴耳武帝因此止役

元帝后厭居深宮王莽欲市其權令四時巡四郊春幸  
蘭館註上林蠶所也

西都賦上觚稜而棲金爵註觚稜帝闕之角也蘇詩壁  
月挂罽罽珠星綴觚稜

梅福曰願一登文石之陛涉赤墀之塗

班固傳周廬千列註宿衛之廬周於宮也千列言多也  
漢書昭帝紀始元元年上耕於鉤盾弄田弄田者天子  
所戲弄也

宣帝紀詔池籞未御幸者假與貧民註折竹以繩繇連  
禁籞使人不得往來為籞池者陂池籞者禁苑也

南史東昏侯遇弒於西弄蓋宮中別道如永巷之類即  
今所謂衙者是也

毛詩外傳曰梁鄒者天子之田也東都賦制同乎梁鄒  
義合乎靈囿

溫庭筠華清宮詞詩澀浪浮瓊砌晴陽上綵旂楊升庵  
曰疊石凹入如險崖狀謂之疊澀石多作水文謂之澀  
浪

甘泉賦列宿乃施於上榮兮日月纔經於枅振註榮屋  
翼也枅中央也振屋栒也言臺高日月星宿皆經於此  
枅音鞅振音辰

役百乾谿費疑驪山

宮室部二 室堂類

左傳向戌來聘見孟獻子尤其室曰子有令聞而美其室非所望也

門飾謂之鋪劉孝標詩金鋪玉鎖琉璃扉江總詩兔形脈脈照金鋪沈佺期詩舞閣金鋪借日懸李元平賦歷金環之華鋪

樓焚焚字音焚註云複屋重梁木多而上出也見太史慈傳

大秦國傳列置郵亭皆堊堊之註堊飾也堊白土

宅大曰連里竟街又曰并疆兼巷窗曰疏寮曰綺寮又

曰廳廡出韻又曰白閒小窗隙曰料戾石礫曰瑱又曰

玉鳥多牽椽曰增桴重棼理木之器曰儻監修曰護作

室單靈曰單外

羊元羣罷北海郡郡舍溷軒有奇巧亦載之以歸註廁屋也

皇甫湜傳屋角曰蛟漏雀穿

唐王鉷宅有自雨亭水從檐上飛流四注當夏處凜若高秋

戴延之西征記函道道如函封也荀子云局室蘆簾局

室室如碁局也

仇覽過邑人陳元之舍曰廬落整頓耕耘以時此非惡人教化未及至耳

姜詩至孝赤眉賊經詩里弛兵而過曰驚大孝必觸鬼神比落蒙其安全註比近也落藩也

綺井亦名藻井又名鬪八今俗曰天花板也

豫章王嶷啓云往歲作小眠齋皆補接爲辦無乖格制高歡微時止龐蒼鷹家團焦中蒼鷹母見團焦上赤氣赫然屬天團焦卽今所云團瓢也

周禮大司徒里宰以歲時合耦於鋤鄭氏註鋤者里宰

治處若今街彈之室金石錄有昆陽城漢街彈碑周名鋤漢名街彈若今之申明亭也

王莽傳有里區謁舍之語蓋不宿客之舍爲里區宿客之舍爲謁舍

驛傳曰使駭音出唐會要又曰官攤出晉令急遞曰疾

置舖兵曰遽人急報曰密驛輕郵

元魏以候望官爲白鷺取其延望之意其時亭堠多刻鷺像漢明帝過亭障有烏鳴亭長射中之曰烏烏啞啞引弓射洞左腋陛下壽萬年恆爲二千石帝悅令天下亭障皆畫烏楊用修紀行詩山遮延鷺埃江繞畫烏亭

漢書房舍房者迂也漢時野路候迎賓客之所皆有房舍

表異錄卷四終

表異錄卷五

三原李錫齡孟熙校刊

明珠塢山農王志堅輯

器用部 總載

顏延年云踟躕清防密註清防屏風也

廣雅輓幘幘也

記事珠簫局古熏籠也一名秦篝

田俵子堯時有獬豸緝其毛而為帝帳

柳樞杖也范石湖詩病憐柳樞隨身慣老覺屠蘇到手

難

孔融肉刑論曰賢者所制或踰聖人水碓之巧勝於斷



木掘地蘇詩掘地與斷木智不如機春聖人懷餘巧故  
爲萬物宗機春水碓也

輿服志法駕前驅有九旂雲罕皆旌旗名

射雉賦捧黃閒以密殼屬剛挂以潛擬黃閒弩名剛挂  
矢名

清賞錄右軍有巧石筆架名扈班大令有斑竹筆筒名  
裘鍾

唐書器不行竄註不堅牢白行苦惡曰竄

樂天詩笛愁春盡梅花裏簞冷秋生薤葉中註蘄州出  
美竹製梅花笛薤葉簞

李洞詩六赤重新擲印成六赤者古之瓊髮今之骰子  
也

鈔鉚熨斗也見驂鸞錄鉚母朗切

魏明帝詩晝作不停手猛燭繼望舒庾闡藏鬪賦督猛  
炬以增明謂大燭大炬也周禮有墳燭

金錢百萬酒千鴟鴞盛酒器也

爾雅註鸛鷓似鳧而小膏可瑩刀杜詩筆健凌鸚鵡鈔  
鋒瑩鸚鵡又云鑄錯碧嬰鸚鵡膏鉞鏑已瑩虛秋濤

戴法興臨死封庫藏使家人謹錄籥牡

竟陵王得古器小口方腹而底平以問陸澄澄曰此名

服匿單于以與蘇武驗之果然

藥崧為郎獨直臺上無被枕杜註杜思漬反謂俎几也  
條脫即今之腕釧也

繩屏草鞋也

出儀禮

白樂天詩日暮半爐麩炭火今人謂炭浮者曰麩炭蓋  
本此李茂正優人亦曰歸長安賣麩炭足過一生  
杜詩作水排鑄為農器百姓便之註排蒲拜反冶鑄者  
為排以吹炭令激水以鼓之也

廣陵王荆作飛書封以方底註方底囊所以盛書也  
徐琨母請伐蘆以為泅佐船渡軍註泅水中薄也

溺器曰夜瀦見唐人文集

用修冬日文宮詞曰障風貂尾扇熅火象牙籠象牙籠  
見西京雜記歐陽立詩十月都人供煖筆

周禮六彝皆以舟鄭註云舟下臺也即今之酒盤  
陸雲與兄機書有剔齒纖一枝以寄兄

梁元帝讀易賦著名聚雪卦有密雲陸魯望幽居賦著  
名聚雪栞號落霞

會稽竹簟供御號為流黃簟唐詩珍簟冷流黃  
供御炭用鵝鶩色胡桃文

韓文公湘簟詩蘄州笛竹天下知一府傳看黃琉璃卷

送八尺含風漪白樂天簞冷秋生薤葉中薤葉秋生琉璃夜滑

白樂天詩紅缸霏微滅碧幌飄颻開張光朝詩星缸凝夜暉陸魯望詩月缸曉屏碧皆謂燈也李賀詩曉虹屏中碧虹卽缸

申王取豬毛刷淨命工織為席滑而且涼號曰王癸席出河東備錄

髀箭響箭也見南史

西都賦招白閒下雙鵠榆文竿出比目二句為對御覽引風俗通白閒古弓名文選以閒為鵬非也

藜牀牀之為杖也桃笙笙之為簞也阿錫錫之為布也

藻井井之為言板也玉卮無當當之為言底也列子衣阿錫曳

齊執錫韻書作裼袒衣也

梁簡文詩織成屏風金屈戌李商隱詩鎖香金屈戌李賀詩屈膝銅鋪鎖阿甄膝與戌同窗戶鎖鉸具也

桃笙以桃竹為簞也出柳子厚詩呼簞為笙宋魏時語不借為草履不落為酒杯不律為筆

軍持為淨瓶繞梁為樂器

杖名扶老鳥亦名扶老蟲為寄生軍裝亦名寄生鷓名晨風馬亦名晨風木名長卿彭越亦字長卿草曰屠蘇

屋曰屠蘇冠幘曰屠蘇酒亦曰屠蘇

山谷論筆云其擇毫如郭泰之論士其頓心著副如輪扁之斲輪

酒盧賣酒之處壘土所築形如殿盧以居酒甕

東坡詩麥光鋪几淨無瑕註麥光紙名又曰為把栗尾書溪籐註栗尾筆也

棗心蘭蕊皆筆名

雲膜紙也

魚卵紙也右軍事可對鼠須

山谷詩宣城變樣蹲雞距諸葛名家將鼠鬚皆筆名

隋志有龍舟鳳船音墨亦舟也

淥鷁葱鷺皆船名見劉楨賦

金翅戰船名出南史

江夏王義恭還朝文帝以御所乘蒼蠻船上迎之

帛蘭船以帛為蘭檻也出漢書

孫權時名舸為馳馬曹真有快馬呼為驚帆

趙興欲出見矯稱侍中者鮑永拔佩刀截馬當匈乃止

註當匈以韋為之

犀舟勁楫出張衡傳

摸枋大木也以人立兩旁但可以手摸出齊東野語

表異錄卷五終

表異錄卷六

三原李錫齡孟熙校刊

明珠塢山農王志堅輯

音樂部 總載

聞宮閏徵卽變宮變徵五音惟宮徵有變

顧愷之箏賦斌麗含清輕縟璘彬孫諺琵琶賦抑揚按

念冉嫋摧藏皆極形容之妙

箏箏多撮琵琶多撈空侯多擘柳琴多擊

妓女以鹿角琢爲爪以彈箏曰繫爪梁簡文箏詩停絃

時繫爪息吹治脣朱又曰義甲唐劉言史詩送卻玻璃

義甲聲 繫一作擊

稽康琴賦慕老童於駝隅欽泰容之高吟註駝山神老

童居之其音常如鐘磬老童顛項子泰容黃帝樂師

羅敷豔歌丹脣含九秋妍迹凌七盤九秋曲名七盤楚

舞妍迹一作妍初

漢書雅聲遠姚註姚僛姚飛揚之意

奚囊橘柚鐘一名長嘯一名粲谷三餘帖簫一名石弦

一名紫佩

牛僧儒初以所業謁韓愈皇甫湜其首篇說樂韓始見

題卽掩卷問曰且以拍板爲甚麼僧儒曰樂句二公大

稱賞

絲竹淒唳出吳越春秋

倡飲甚歡倡樂也

笙簧時以火炙之樂家謂之煖笙陸魯望詩妾思冷如

簧時時望君煖

張釋之傳愼夫人鼓瑟上自倚瑟而歌註倚瑟卽今之

以歌合曲也

王建宮詞羅衫葉葉繡重重金鳳銀鷺各一叢每遇舞

頭分兩向太平萬歲字當中唐樂府雜錄云舞有健舞

軟舞字舞花舞馬舞字舞者以舞人亞身於地布成字

也故建有太平萬歲字之句

表異錄卷六終

表異錄卷六終

表異錄卷七

三原李錫齡孟熙校刊

明珠塢山農王志堅輯

軍旅部 總載

尹子環龜脫兔之法謂兵法也孫武子敵人開戶後如脫兔敵不及拒環龜出司馬用衆篇歷沛歷汜兼舍環龜謂環陣如龜也

國語挺鉞搢鐸以與楚王毒逐於中原言鳴金鼓而暴戰也

西征賦谿子巨黍異絜同機礮石雷駮迅矢直飛註谿子蠻夷拓弓也巨黍古良弓直飛箭名

表異錄卷七

惜陰軒叢書

裴耀卿論蓋嘉運曰萬人之命倚於將示不得已故鑿

凶門而出今酣呶朝夕胖肆自安非愛人憂國者

貞元中宣武軍兵變執城將曹金岸另之註另古瓦翻  
卽丹字也

李陵曰令漢貫陵罪全其老母使得奮大辱之積志庶  
幾乎曹柯之盟

郭圖說袁紹曰監軍之計在於將牢又諸將謂姚萇曰  
陛下將牢太過耳將牢猶言持重也

李廣自負其能數與虜确

武帝謂曰日者北邊有興註謂發軍也

隗囂傳多設支閼障閼也

尉繚子兵法耕有春懸耜織有日斷機言用兵妨耕織  
也國語室無懸耜

後漢書簡其精勇多其牢賞註牢廩食也

燕王爲慕容翰造可手弓矢註可手便手也

漢明帝報中山王書今五國各官騎百人稱媿前行註  
齊整也

董卓縱放軍士剽虜資物謂之搜牢言牢固者皆搜取  
之也

中外共誣皇甫規貨賂羣羌令其文降註以文簿虛降



非真心也

耿國傳使塞下無晏開之警註有警急則開門晚也相如傳攝弓而馳註謂張弓注矢而持之也

三國志虜亦遮守蹊要註蹊徑路也謂徑路要處也

王尊傳迹射士千人註言能尋跡而射取之也又有射聲校尉言聞聲而能射之

韓安國曰高皇帝圍於平城匈奴至者投鞍高如城者數所

此段小寇出於凶愚天網宏罩理不足論

豫章王  
疑語

李希烈攻汴州驅民運木土築壘忿其未就并人填之

謂之濕薪

典韋陷呂布陣謂等人曰虜來十步乃白之等人曰十步矣又曰五步乃白等人懼疾言虜至矣韋持戟大呼而起所抵無不應手倒者註等人立等以募人及等者謂之等人

孫策攻劉繇牛渚營盡得邸閣糧穀戰具註邸至也言所歸至也閣度置也謂轉輸之歸至而度置之也

公孫瓚自居樓上斥去左右專與姬妾居文簿書記皆汲而上之

王莽時四方皆以饑寒起為盜賊常思歲熟得歸鄉里

衆雖萬數不敢略有城邑日闕而已註闕盡也隨日而盡也此言羣盜攻剽所得日給口體而已

唐詩請纓下南越援繩縛涼州

管子曰無委致圖城脆致衝註城中無積糧曰無委

莊子壞植散羣植者邊境植木以為界謂徹成罷兵鄰

封混一也

輕呂寶劍名武王用以擊紂

春秋傳三軍皆譁卸以振旅卸音口歡動也杜詩傳士

卒覺藻註言其和睦歡悅如覺之戲於水藻也

彭萊罵先主為老革註猶言老兵也

梁戴曷從軍行云長安夜刺聞胡騎犯銅鞮刺聞夜有急報投刺於宮門也

魏耿令貴曰若不能殺賊又不為賊所傷何異逐坐人也註指當時持文墨議論者但好相隨逐坐談也

韓蘄王軍中別置親隨軍擇勇力尤異者充之謂之背

危危酒瓶也

韜章罩虎捲旆收鳶言凱旋也

今補埽旦出公羊註玉弩驚天出漢書註

蚩尤曜旗王良策馬皆星氣也

吐蕃陷麟州虜將徐舍人會飛鳥使至召其軍還飛鳥

使猶傳騎也

邊有質館以居降夷

星施出王會篇施旗屬也可對月羽

馮唐傳夫士卒盡家人子起田中從軍安知尺籍伍符

註尺籍所以書軍令伍符軍士伍伍相保之符信也

蕭淵明與王僧辯書凡諸部曲並使招攜赴投戎行前

後雲集霜戈電戟無非武庫之兵龍甲犀渠皆是雲臺

之仗王勃滕王閣序紫電清霜王將軍之武庫正用此

事

牢稟通懸出劉虞傳言軍糧不續也

桔槔灌園之器邊方舉火亦用桔槔唐詩桔槔烽上暮

煙飛又桔槔方灌園

西京賦植鍛懸猷用戒不虞猷音伐打更木也

刁斗曰金柝

周文嘗爲項燕軍視日註視日時吉凶舉動之占

侯景浴鐵數千葉翼衛左右註言鐵甲堅滑若以水浴

之也

見梁紀大寶元年

魏詔諸州鎮軍貫非有罪配隸者皆免爲民軍貫軍籍

也

纂兵集兵也

董卓拔戟擲呂布布拳捷得免

齊斧虞喜志林音側階切凡師出齊戒入廟受斧故曰齊也陳林云腰領不足以膏齊斧註云斧鉞也以整齊天下太平御覽引漢書王莽傳喪其齊斧亦音齊淮南子摩蕭斧以伐朝菌

越世家句踐伐吳發習流二千人習流蓋士之習水戰者註以為流放之人誤

耶律德光指劉知遠曰此都軍甚操刺操刺俗語勇猛也

肱髀相依即脣齒意

混灑軒囂作亂貌

又曰羣臣連與成朋賜燕王璽書曰樊鄴曹灌攜劍推鋒從高皇帝墾菑除害耘鋤海內當此之時頭如蓬葆勤苦至矣然其賞不過封侯今宗室子孫曾無暴衣露冠之勞裂地而王之

廉范傳虜自相隣藉死者千餘人

滿寵論曹休曰今所從道背湖旁江易進難退此兵之窪地也

甘廷壽傳試弁為期門哀帝贊卞射註並以弁卞為手搏

李陵傳轉鬪千里矢盡道窮士張空拳司馬遷傳作張空拳註拳弩弓也

兩甄軍中兩翼也左傳曰左右拒韓非子軍門曰和一作

獵伍曰甄音陣

傳變謂耿鄙曰不若息軍養德明賞必罰賊得寬挺必謂我怯羣惡爭勢其離可必註挺解也緩也

黥布傳陰拱而觀其孰勝言坐觀成敗也

鄧訓傳擁衛稽故令不得戰註謂稽畱事故也

左傳曰衷戎師史記匈奴傳善為誘兵以冒敵漢書作包敵

衛青傳得右賢裨王十餘人

李廣自以大黄射其裨將註黃肩弩也

喧呼狼鬪出唐書韋宙傳

風纏露沐即櫛風沐雨

梁兵及潞州築夾城為蚰蜒塹以圍之

朱伺常所調弩忽噤不發

石勒集衣冠人物別有君子營

岑彭傳棹卒六萬餘人露橈數千艘註棹卒持棹行船也露橈謂露楫在外人在船中

高仙芝以李嗣真為陌刀將唐六典武庫分掌兵器刀

制有四儀刀障刀橫刀陌刀

長楊賦摩城擗邑下將降旗擗音憶舉手擬之也又分  
黎單于磔裂屬國黎與勢同謂剝析也又腦沙幕箭余  
吾註腦塗沙幕箭入余甚言其大破死亡箭古髓字  
趙充國傳軍士寒手足皸瘃註皸坼裂也瘃寒創也  
馬融疏曰盡力率厲埋根行首以先吏士註埋根言不  
退也行音杭

援旗紜族引旗聚眾也

奮威德以投天隙天時之閒隙也

軍中以端午走馬謂之躡柳音札見文昌雜錄

雜一作雅

段遼遣兵攻柳城都尉石琮城大慕輿埜并力拒守註  
城大猶城主也

表異錄卷七終

表異錄卷八

三原李錫齡孟熙校刊

明珠塢山農王志堅輯

植物部一 蔬穀類

韓子禹身執藁鹵以為民先函即插字

漢文帝詔今農墮身從事而有租稅之賦

陸龜蒙身操耒鍤蒺藜刺無休時註蒺藜除草也

蘇詩秋霖暗豆莢夏旱癰麥人本草蕎麥取人作飯食

之下氣蓋麥之心曰人

范石湖詠吳米詩長腰瓠犀瘦齊頭珠顆圓

廣志香秬有青幽白夏之名

刈稻後得雨復抽餘穗謂之稻孫見坦齋筆衡

禾不因種而生曰稻侯景作亂貴家大族皆自出采稻所謂稻生是也

罷亞稻多貌

宿麥註舊也麥必經年而後熟

山谷詩夏栽醉竹餘千個春糞辰瓜滿百區齊民要術

二月辰日宜種瓜

洪邁老圃賦云織女耀而瓜薦大昴中而芋食春秋元命苞云織女星主瓜果孝經援神契云仲冬昴星中收芋莖

清異錄吳越錢氏子弟逃暑取一瓜各言其子之數言

定剖觀負者張宴謂之瓜戰

廣志有龍蹠獸掌羊髓兔頭皆瓜屬陸機賦有金釵虎蟠玄肝素腕皆瓜名

山谷詠菜曰雨甲烟苗

養生談錄曰韭性暖號草鍾乳

宋字種蔬三十品雨後行園圃曰天菑此徒助予鼎俎家復何患

王彥章壘壇種花急欲苔蘚而經年不生曰叵耐這綠拗兒



令草宜男花也

出傳  
玄賦

述異記苔名重泉亦呼宣蘇亦名妬草廣博物志苔為

青膚一名蠅蟻衣

馬希範病酒厭膏膩袁居道曰大王今日使得貧家纏

齒羊謂蔬茹也

書帶新抽屏風互發皆言草也書帶出鄭玄屏風見楚

辭

如草既薙厥藜其猶有綴芳

紫龜綠鼈並太液池草名

蘆蕨一名雹突

見廣  
志

韓退之聯句鴻頭排刺茨山谷詩剖蚌煮鴻頭鴻頭茨也

列子趙襄子狩於中山藉芴燔林芴舊草未芟新草又生也

瓦松謂之昨葉垣衣謂之昔邪吳均詩惟對昔邪房如

愧蜘蛛屋

佛經云奇草芳花能逆風聞薰江淹別賦閨中風暖陌

上草薰正用之六一詞云草薰風暖搖征轡又用江淹

語

蓮實一名水芝又名湖目王芝詩綠齊山葉滿紅曳水

芝銷

卯菱卽芡也

見管子註  
五行篇

植物部二

花果類

陸機與弟書張騫爲漢使外國十八年得塗林塗林謂安石榴也

石榴一名丹若一名天漿

湘潭記陸展見楊梅歎曰此果恐是日精

越州人呼楊梅爲楞梅

見能改  
齋漫錄

文與可朱櫻歌曰凝霞作九珠尙輒油露成津蜜初割

君王日午坐猗蘭翡翠一盤紅鞞鞞

橄欖爲諫果苦筍爲諫筍

甘蔗一名諸蔗

出相  
如賦

一名都蔗

出曹子  
建詩

亦作椰臆

出神  
異經

艾一名冰臺

見爾  
雅

臯盧昌明皆菜名皮日休云十分煎臯盧白詩有綠昌

明

橘曰木奴松曰蒼官

笋爲竹萌

出周  
禮

亦名竹胎

出說  
文

櫻桃一名鸞桃亦名含桃

茶名森伯又名晚甘侯

見清  
異錄

蓬蘽蘆花也

唐詩門外晚晴秋色老萬條寒玉一溪煙蓋指竹也  
宋懔春望詩都尉新移棗司空始種楊漢人尹都尉著  
書名種植法有棗鼠耳槐兔目之語淮南子二月之官  
司空其樹楊

汜勝之書栽樹正月爲上時二月爲中時三月爲下時  
然棗雞口槐兔目桑蝦蟆眼榆負癭散其餘雜樹鼠耳  
蜜起各以其時

栝松百年卽有白衣如粉謂之**交藕香**出本草

劉張每荔枝熟時設紅雲宴

露甲瑞香也

寧王每春時於後園紉紅絲爲繩綴金鈴繫花梢之上  
有鳥雀翔集則園吏掣鈴索以驚之號護花鈴

南溪貴瑤趙純節喜芭蕉軒窗館宇咸種之時號蕉迷  
綠條散風清陰交陌盛弘之荊州記交柳

越多橘柚園歲多橘稅爲橙橘戶吳書闕尙表請除臣

之橘籍

白楊一名高飛一名獨搖見廣志

皮蕃食竹筍曰三年不見羊角哀矣

懷素貧無紙學書常種芭蕉萬餘以供揮灑名曰綠天  
作種紙庵

沙門曇霄種葡萄人號草龍珠帳

唐穆宗宮中牡丹花開以重頂帳蒙蔽欄檻置惜春御  
史掌之號曰括香使

地黃一名地錦

見雷公  
炮炙序

醫家謂棗為百益紅梨為百損黃

溫庭筠謂葡萄是賜紫櫻桃黃葵是鍍金木槿

仙家呼枸杞為三青蔓

將離贈芍藥芍藥一名可離相招贈文無文無一名當

歸欲人忘憂贈丹棘丹棘一名忘憂欲人獨念贈青棠

青棠一名合歡

菊一名更生一名日精一名女華一名周盈一名禽華

一名傅延年

陶穀作筍墓誌曰邊幼節字昭中晉林琅玕之裔也以

湯死

杏不實者深冬以酒奠而祝之謂之嫁杏明年結子無

數江淮亦有嫁橘法

綠英金片皆茶名唐六典

雨腳雲花

茶經

白傅紫薇詩除卻微之應見愛世閒少有別花人薔薇

詩移他至此須為主不別花人莫使看

唐末文人呼芍藥爲婪尾春婪尾酒乃最後之盃芍藥殿春故以名

司空圖詞謂梨花爲瀛州玉雨

婦人取醪醴置書冊中冬閒插鬢謂之花腊

鹿韭鼠姑俱牡丹舊名

出神農本草

游仙記王母居龍月城有李實上皆有黃中二字又王母遺黃帝有上清玉文之李

酉陽雜俎人有折博陵君豹山園桐枝者公曰何爲傷我鳳條

古詩風搖羊角樹日映雞心枝羊角雞心皆棗別名

本草菊一名傅延年朱新仲詩三經誰從陶靖節重陽

惟有傅延年

嶺南竹曰澀勒

表異錄卷八終

表異錄卷八

